


孟鄰堂文鈔

卷十五至卷十六
附跋



孟鄰堂文鈔卷之十五



武進楊 椿農先氏著

曾孫魯生校



楊氏家傳

楊氏之先與晉同祖羊舌大夫突之後也突生職職
 生四子赤肸鮒虎號羊舌四族肸字叔向為晉太傅
 食邑於楊故姓楊氏肸生二子伯石季夙祁盈之難
 季夙逃居華山仙谷宗族由是分散或在周或在韓
 在周者名祺為周敬王大夫在韓者名苞為韓襄王
 將守修武而季夙之後潼關尉惠左庶長元鄢陵侯
 章皆世官於秦焉然自章以上其世次先後不可考

而傳也章子款爲秦上卿生子碩從沛公征伐爲太史生子喜爲漢王騎將以誅項羽功封赤泉侯喜生殷殷生母害再世嗣侯母害以孝武元光二年免生子敞孝昭時丞相封安平侯敞生忠忠生譚孝宣五鳳四年季父平通侯惲有罪譚亦以是失其封也譚生寶西漢之季隱居教授王莽屢徵不出光武高其節賜號靖節先生生子震仕孝安世爲太尉以忠直稱於天下生子四牧尙秉奉讓之後無譜不知其子孫伯子牧爲富波侯相富波相十二傳而爲隋桓公忠云叔子秉秉子賜賜子彪俱漢三公彪生修修常

與曹植書云吾家子雲然考雄自序云揚氏出有周伯僑或曰周宣王子尙父封於揚其後滅於晉春秋時有揚孫爲秦戍鄭者其苗裔也而周惠王十七年齊人遷陽陽昭王之後也自後晉有陽處父爲太傅或又云周景王封少子於陽其子孫因以爲姓蓋楊氏與揚氏陽氏各爲一姓而後世之以揚爲楊且謂楊之出於陽者皆非也季子黃門侍郎奉奉生黃門侍郎敷敷生大中大夫纂纂生大中大夫品品生宏農令國國生武陽長史襲襲生林林生結結爲慕容氏中山相當慕容氏時仇池楊氏曰初者其先太岳

五洲堂文金 卷五
之苗裔也而周衰晉有楊干楚有楊朱韓有楊達秦有楊穆楊熊漢之時吳房侯楊武河東楊茂宜陽楊僕京兆楊政巴郡楊仁蜀郡楊終楊由犍爲楊厥會稽楊璇三國河內楊俊天水楊阜襄陽楊儀犍爲楊洪楊戲與晉太傅漢太尉先後著名者甚衆以此知楊氏派別非一而吾家本於太傅者以季夙居華陰而安平侯太尉俱爲華陰人也結生太守繼繼生洛州刺史簡公暉暉生河間太守恩恩生恆州刺史鈞鈞以曾孫素貴贈爲越恭公恭公生西魏侍中夏陽靜侯儉儉之兄曰度支尙書暄者素之祖也儉生隋

刑部尙書吳州總管樂昌侯文昇文昇生安仁安仁生德立德立生宗彥自安仁至宗彥三世皆未仕而宗彥之子隱朝爲唐邵陽令隱朝生臨汝令燕客燕客生國子祭酒寧寧生京兆尹虞卿虞卿生太子少師堪堪生刑部員外郎承休楊氏自承休以上世居宏農華陰而承休仕唐昭宗朝使於吳越道阻不歸遂留杭州於是始分宏農之籍籍錢塘矣承休生巖爲吳越丞相巖生郾尙書職方員外郎郾生蟻贈禮部尙書蟻生侃以右諫議大夫集賢院學士知亳州封號畧縣男避宋眞宗諱改名大雅大雅生颯官將

作監主簿。淪爲人好學。是時謝無逸講學臨川。淪往從之。游築室講習。因家臨川。而楊氏則又世爲撫州人。淪生道卿。道卿生有常有常。生挾挾爲潭州節度推官。生子士英。字振英。宋紹定間。客游常州。是時金宋爭於兵革。四方盜賊乘間起者。所在皆是。振英旣不能歸。遂居常州城南。曰錢塚村者。夫自章以至於挾其世傳。旣可考矣。而其德行功績著於前史者。或詳或不詳。不可悉紀。第載其世次云。及振英居常州。迄今五百餘年。世爲郡中望族。其家世興衰之迹。始可得而紀云。振英生景榮。字世華。世華生崇貴。字子

良。咸以農爲業。子良季年。值明初定。與百姓更始。子良以墾荒田起家。生子名之。字以實。自錢塚徙居前。黃洪武建文時。以實以財雄於鄉邑。性好施。調給貧乏。鄉邑稱之。生子文字。仲文初振英。至子良三世。俱傳一子。而仲文獨有弟。自幼相友。愛父母。卒兄弟同居。至沒齒。未嘗異錢帛。文生林。字克盛。克盛兄弟四人。子孫漸繁。衍矣。然皆同爨。如仲文在日。景泰中。歲飢。有司勸分民間。而楊氏所輸。以數千石計。例得授承事郎。克盛不受。以讓兄茂之子溥。溥亦再三辭。勿受。有司旌其門。爲義門林。生濟。字宗舟。別字月川。月

孟齋堂文錄 卷五
川當天順成化間天下承平百姓安樂吾家世居前
黃富厚生殖兄弟同居八十餘年號稱極盛每歲孟
春家僮數百人各跨犢擊鼓吹籥祀田祖祈穀然後
服農秋冬報賽亦如之舍旁疏一溪築室於其上名
曰雙橋書屋命子孫讀書其中當是時月川既督率
其諸子孫不縱爲華靡遨放事諸子孫悉循循自謹
衣食必均出入往來交際必告家長諸子孫婦亦雍
和肅穆無詬言諍語歲時伏臘月川兄弟坐堂上羣
從子孫咸盛衣冠立堂下以次進拜跪奉觴上壽畢
皆肅容拱手趨侍於側命之坐然後坐命之食然後

食不命不敢也以故楊氏孝友聞天下濟生堂字伯
升別字後生以國子監生爲江西按察使司知事生
子鑾字諧夫別字三省爲人忠厚長者承前世極盛
之後家室饒裕積田十八萬畝有奇廬舍廣袤數里
三省同時諸昆季皆役財驕溢因爲奢侈者或有也
嘉靖末吳民困於糧役富家豪戶屢有存者而楊氏
嘗一再代輸江南逋賦故家業亦遂日以耗減生子
一言字子約子約早卒生子諱守德字惟恆別字繼
山於椿爲高祖楊氏至吾高祖時蓋中落矣高祖爲
人侷儻有大志能自淬厲爲學問處宗族備極敦睦

宗族中有窶貧者解衣推食無虛日高祖嘗自言曰
吾家自吾祖之高祖以來屢世未嘗分異吾高祖之
兄弟行若干人吾曾祖之兄弟行若干人春秋里閭
灑掃上祀一門雍睦見稱鄉黨今數十年來宗門零
落吾又少遭閔凶獨行畏踴每念家世孝友切切不
能忘也爲吾子孫而不克和協其何以見於家廟其
所以訓如此生子三長爲吾曾祖贈中大夫貴州布
政使司叅政管按察使司分巡貴西道事諱啟謨字
元顯曾祖天性孝友事二親左右無違與二弟相愛
如左右手先世田業以瘠薄自予曰無以是爲兄弟

累平居不妄言笑雖一舉動必遵禮法於書無所不
窺家傳詩業嘗作詩論幾百餘言以授學者學者咸
師尊之生子四長爲吾祖諱廷鑑字冰如別字靜山
官翰林院修撰累贈中大夫貴州布政使司叅政管
按察使司分巡貴西道事始吾高祖以孝友爲訓宗
黨子弟多化之及吾曾祖繼起則行益修謹而一時
羣從以下雍雍敦孝友之風矣吾祖生有異秉及長
遵吾高祖曾祖之言行崇禎十六年廷試第一甲第
一名進士當是時明室已大壞矣流賊李自成張獻
忠橫行天下其冬李自成陷山西將由塞外犯京師

公待漏朝房語大學士曰居庸險阨可憑盍早修完益兵擇將爲之備某某皆喞然曰爾書生新進柰何言及此堂堂天朝百靈呵護何備之爲公知不可與語也會召對以告上上不納明年正月復召對公同官有建議召將九邊募山東豪傑入援者公言此緩不及事且今日不患無兵患御之無律不患無將患召之不來大帥未叛者尙有人精兵不下數十萬賊自孫傳庭敗後諸將無一與戰者氣驕甚今誠激勵忠義勸勉有功懸非常之格以待武勇之帥傾府庫之財厚俘馘之給則賊可敗也上然之因請命皇太

子監國南京又不納未幾賊至居庸關太監杜勳以關獻十九日京城陷公自縊者再悉爲僕人解救有言駕幸南京者公因變服於浣花僧舍將南下爲賊將田虎所執脅降公公不屈尋以間脫歸乃奉吾曾祖父母屏居田野歲餘

王師悉定江南

詔以地方人才爲急內院督撫諸臣交章題薦

章皇帝屢欲用公公再三以疾辭乃止於是杜門卻掃潛隱東臯之麓而一時節使守令凡有興除咸躬造所居扣關諮訪公旣不得已則於民生休戚知無

不言以故多隱被其澤者為人惇摯篤於倫誼初入翰林也兩尊人尚皆無恙於時鄉黨之人莫不榮吾祖而尤羨吾曾祖父母之為能有子也未幾遭離鼎革兩尊人亦相繼淪謝吾祖痛不欲生每慟輒絕其後值歲時祭祀輒號哭如始喪時遇諸弟曲有恩禮二叔祖諱廷銓字衡如別字衡山順治十七年順天鄉試副榜敦樸豈弟有古君子風三叔祖諱廷蘊字容如別字簡庵順治三年鄉試舉人十二年會試副榜選徐州沛縣教諭陞湖廣黃州府黃陂縣知縣四叔祖諱廷錦字綱如別字閣齋順治十二年進士累

官中憲大夫整飭天津兵備道山東布政使司叅議兼山東按察使司副使兩叔祖之宦於南北也吾祖誥教之者甚至而兩叔祖亦事兄如事父凡所為必先請而後行後雖出仕數十年未嘗一日變易其敬愛蓋如此吾祖治家尤嚴而有法間則與諸子弟講論典籍述祖考之彝訓諸子弟皆低面聽奉家庭之上凜若公府諸子弟燕見雖盛暑必冠肅肅如也在側未嘗敢輕言笑吾祖生吾世父諱大鯤字九搏一字陶雲別字秋屏吾父諱大鶴字九臯別字芝田世父順治十六年進士選內宏文院庶吉士累遷嘉議

大夫山東按察使司按察使吾父康熙十八年進士
選翰林院庶吉士授翰林院編修今爲左春坊左中
允兼翰林院編修咸孝友如先人二叔祖六子鳳儀
鳳翥三濤大鵬大成大武三叔祖一子湘四叔祖二
子潛瀛潛嘗知河南開封府通許縣事蓋自先大父
廷試第一三四叔祖皆鄉會進士而世父及吾父仍
再居翰林子孫振振蟄蟄世數漸遠而家法益峻忠
厚雍睦之風不墜故吾郡稱門第之盛者必歸楊氏
吾父生子七人椿其第三子也少好考先世遺事見
吾祖宗孝友於家者竊思自古鼎彝所勒皆稱揚其

先祖之美漢唐以降巨家大族必有紀載之書然後
揚名後世垂則於子孫用是作家傳一首於前代孝
友之事尤詳著之若其他居官治家具具有方畧則國
策家乘已悉誌之矣非家道所以興衰故不著

贊曰明崇禎間大父客江寧於江西宗人所得先世
譜牒一卷自晉羊舌大夫至始遷武進祖振英公官
位世次咸具歸藏之祖祠康熙三十二年椿在京師
族祖父競如翁爲河南上蔡縣知縣將修家譜吾父
命椿書之以寄翁椿謹次之如右昔歐陽文忠公云
太尉嘗有德於漢故其後昌且久今此譜歷周漢迄

宋千八百餘年傳世久遠無一名位缺者徵之歐陽
公言益信而唐書宰相世系表及他書或與茲譜異
因具論之疏其尤異者綴於左方左傳羊舌四族杜
預註銅鞮伯華叔向叔魚叔虎兄弟四人孔穎達疏
世本叔向兄弟有季夙疑季夙卽虎服氏數伯華叔
向叔魚季夙劉炫云虎時不在別有季夙世系表季
夙職第五子不在四族之內椿考季夙之名不見左
傳又叔向而下三人皆以叔稱左傳昭公二十八年
子容之母走謁諸姑曰長叔姒生男孔疏伯華兄弟
伯華最長叔向次之其餘諸弟皆小於叔向故謂叔

向爲長叔明叔向之弟皆稱叔也今譜言季夙爲叔
向子疑當以譜爲正一也羊石虎見左傳杜服二家
註稱爲叔虎蓋虎名叔虎字也左傳襄公二十一年
欒盈之黨有羊石虎又有叔羆自是二人世系表乃
以叔羆爲虎字二也世系表章生三子苞朗款今譜
無朗名又不以苞爲章子三也赤泉定侯殷見史記
高祖功臣表而漢書功臣表唐書世系表俱作敷殷
敷字相近疑宋人諱殷沿誤而不之察四也史漢功
臣表定侯生母害唐書世系表胤字母害胤爲宋藝
祖名宋人作唐書尙不之改史漢何改書其字五也

五經堂文金 卷五
太尉神道碑長子牧次讓次秉次奉與譜同後漢書
傳太尉五子世系表五子牧里秉讓奉碑係太尉孫
沛相統門人陳熾等立去太尉時不遠表傳作於後
人而里之名傳中亦未見表又無其子孫六也後漢
書太尉傳牧富波相太尉神道碑及牧子沛相繁陽
令二碑俱與傳同不言封侯刺史世系表乃誤以傳
中高舒之荊州刺史屬之牧又誤以傳中富波相爲
富波侯七也神道碑奉爲黃門侍郎與譜同後漢書
太尉傳不言奉官世系表奉後漢城門校尉中書侍
郎今考中書侍郎司馬晉泰始中始改通事郎爲之

後漢時不應已有是官八也世系表牧十八世孫鉉
奉八世孫結俱仕燕一爲北平郡守一爲中山相而
北史及隋書本紀鉉太尉八世孫今考太尉之薨在
東漢延光三年下距晉永和六年燕取北平又八年
晉升平二年燕取中山其二百三十五年以三十年
一世計之鉉之世當以北史隋書爲正又世系表牧
十一世孫孕隋文帝之十三世祖而隋輔國將軍河
東公贊乃孕五世孫其世次相懸亦不應如此九也
漢書侯表安平侯譚與赤泉侯七世賜復者同名宏
農令國世系表未載而表中牧之後後魏中散大夫

亦名國安平侯字漢書傳未有而世系表并赤泉三侯之字俱有之蓋世遠族殷簡編譌謬史官撰述掛漏穿鑿皆所不免姑紀所聞以俟他日之博考云爾
遷常州第十五世孫椿謹撰

楊氏內傳

椿不幸生九齡而喪我太淑人於先世母氏之事未能詳也竊嘗聞吾父諭德公訓椿者曰善乎匡衡之言曰福之興莫不本乎室家道之衰莫不始乎梱內夫詩書所紀圖史所傳家國廢興之故關於內助者多矣我楊氏自居前黃世以孝友傳家歷代祖妣咸

有懿德汝母來歸復以令淑見稱里中人爲之語曰前黃楊氏慶遠流長先馬後郎管吳洎莊言其禮法相嗣也汝祖修撰公懼後嗣不類朝夕集子姓於庭而命之曰易曰二女同居其志不同行曰睽二女同居其志不相得曰革夫同居而不同志小則必至於睽而大乃或至於革易又曰風自火出家人火之勢烈矣風自火出則其烈更甚焉此同居而不同志睽與革之漸也君子觀其象則反修其身故曰家人有嚴君焉又曰威如吉家不可以不正而正家又非徒尙嚴也特威如而已威如者言有物而行有恆也言

有物而行有恆則家之教不肅而成其政不嚴而治故有孚吉也又言家庭失好往往始於小忿而煽成於婦人張公藝九世同居以忍見稱夫忍則已有怒非不藏也已有怨非不宿也若遇必不能忍之事屬有讒婦人交鬪其間舉平日所藏所宿之怨怒而發之於一旦禍將有不可言者仁人不見可怒奚有於藏不見可怨奚有於宿無怨無怒則寬平和易雖百讒婦人奚損哉又言易曰富家大吉順在位也治家之道莫先於富而率家人以富之者主婦也故象以順在位言之司馬遷貨殖傳僮手指千註僮奴婢也

作務須手指故曰手指張安世爲衛將軍夫人自紡績家童七百人皆有手技作事是以能殖其業富於大將軍光近代有家之人衣食稍裕主婦卽逸居無事而爲之奴婢者惟奔走先後以爲能蓋公父文伯魯大夫也見母之績懼于季孫之怒而宗周之婦已休其蠶織陳之子女且有不績其麻市也婆娑者矣終窶且貧又焉足怪今欲家之富莫若令家之內外無閒人無閒人則生者衆矣此主婦責也又言坤爲地母道也妻道也爲吝嗇志不均也爲文有侈心也爲黑見不明也夫以不明之見而存不均之心又加

之以好侈欲其不贖貨也難矣論語曰見利思義婦人女子亦知義爲何物且見利思害可耳唐中書令崔元暉之母盧氏戒元暉云吾聞從宦者貧乏不能自給此是好消息若財貨充足衣馬輕肥此是惡消息元暉從其言卒以廉謹著名蓋知消息之好惡則於利害必審利害審而義存其中矣明工部尙書吳中好貨其妻閱其誥命笑曰上誠知人終篇何嘗有一廉字爲男子者柰何以不廉爲妻所笑哉又言內則古所以齊其家者也其事不出閨門之內其詳在織衽組紉酒漿籩豆菹醢之微內則廢婦人之不賢

者相與嘻嘻而不自檢其所謂賢者往往與聞闔外而夫君之事反多受制於室人大雅曰哲夫成城哲婦傾城傳言哲知也婦人之知於事無所見惟託之語言其言愈知則其毒愈盛夫君惑之鮮有不敗乃事者詩人所謂痛切言之也又言呂榮公十餘歲內則正獻公申國夫人教訓之嚴外則焦先生伯強化導之篤唐凝庵幼時襄文公延名師誨之凝庵爲師所責莊夫人聞以指甲自掐其手血流至地左右云何不請之於師莊夫人曰吾請之師道不立矣榮公申國夫人長子莊夫人所生凝庵一人而已而教之

嚴如此非故薄於情誠望其賢也今時之母溺愛其子不欲師之督課曰富貴兒自有於師何與哉甚者義方有訓心弗悅也謂是好形若短耳有過則曲爲之隱不可隱則顯爲之庇父不能知師不能制卒成其子不肖者母也可不謂大哀乎又言奴婢事我者也名我主父母我當以子女畜之兩程子母侯太夫人不喜笞扑奴婢視小臧獲如兒女諸子或加訶責必戒之曰貴賤雖殊人則一也汝如是大時能爲此事否楊誠齋夫人羅氏年七十餘天寒早起自作粥以食其奴婢然後令之服役懿夫之二母者足以爲

法矣諭德公曰修撰公治家嚴肅平居言行必謹余年始五六歲卽日聆教告汝母子歸所以訓迪之者尤詳且切吾茲特舉語汝汝小子聽之母忽雍正十三年春椿久病在假念我先世母氏之事不及今論次懼遂卽於無聞用是稽譜牒參以見聞所及起徐孺人訖我母莊淑人凡十三世採其可見者敘爲內傳并述我祖考彝訓於前俾我世世子孫知所法守焉

徐孺人椿十四世祖世華之配世華父振英自臨川始遷晉陵居縣南永勝西鄉之錢塚村晉陵後省入

武進武進復分爲陽湖今爲陽湖人也振英之配無考世華子子良配黃氏值明初定以墾荒田起家子以實配都氏鄉之都泝里人父都翁里中富室也名知人而以實有異相翁故以女歸焉以實遷於前黃好治田田在錢塚村左右每歲春以實往田廬督耕孺人主饁餉於家錢塚土瘠瘠以實明土化之法尤善撫耕奴他耕者率歉收而以實田所獲獨多其旁田畝數斛以上後之人圖其事於里社所謂錢塚農耕者也子仲文配馬氏縣城人自振英居武進至是五世百六十年矣孺人事舅姑孝每晨候起居於堂

奉膳羞惟舅姑所欲退則率女奴治絲縷麻桌門庭之內機杼之聲相聞也舅姑疾湯藥必親嘗舅姑亡孺人年五十餘哀慕哭泣如孺子後老且耄矣舅姑忌辰必夙興潔觴俎具牲醴哭奠如初喪娣張孺人寡居孺人視色聽聲惟恐有傷其意念先世世傳一子而仲文又早喪弟年未滿四十卽買妾史氏撫字之比於婦姑其欲史氏生子甚慮不當仲文意也仲文子四人孺人出者二其二史氏所生孺人教養之如一景泰中歲飢仲文暨長子克昌已前卒孺人命次子克盛出米粟以賑貧民前後五萬餘斛所全活

不可勝計克盛配潘氏早卒無子繼室以陳氏安上鄉甲墅里人克盛弟兄輯睦諸婦皆恭順孺人於其中尤稱賢孝舅姑喜謂所親曰自吾得賢婦而家日饒給吾後事有託矣舅歿姑老克盛繼兄克昌主家政孺人於小大事無不順適人咸譽孺人孺人曰吾何長惟此心無所私耳里婦竊孺人金衆欲白其事孺人曰彼舊族忍以是玷彼家門哉子月川配章氏安豐南鄉橫山里人性和慧習女紅年三十一卒姑及娣姒咸思之繼室張氏江陰縣金鳳鄉流黃里人章孺人之歿也遺孤子二人張孺人撫之如己出張

孺人後有子矣其愛章孺人子不衰月川以中子少子爲兩弟後而自子其長子後山卽章孺人所出而爲張孺人所撫者也配曹氏江陰縣人子三省配李氏迎春鄉西坵灣人吾家至孺人世始多故矣羣從驕溢諸娣姒不睦孺人處其間以婉惠稱於宗黨子子約配同里黃氏子繼山椿之高祖也高祖生四年而三省歿又二年子約卽世高祖幼祖母李孺人躬自養視之又六年李孺人亦卒高祖伶俜孤苦家業中落又十三年高祖母卽孺人來歸高祖母鄉之武進橋人爲人恭靜仁恕治生不爲纖嗇而家業漸裕

置上腴數畝爲祭田用麻菽餅燒灰以漬種不加以糞曰不潔非所以饗先也穫則藏之高廩屆期春揄簸蹂孺人悉自爲之江南俗重墓祭清明下元時族墳墓之無後里義塚之無適主者孺人歲徧祭之所居三十里間有過時而墓無人祭者遣人周視之備物往祭數十年不怠族姒橫逆孺人和愉下之姒不足卽推己物與之無德色無愠容姒頻復責言孺人受之如初族子弟里中年少貧不能應郡縣試爲具舟楫儲薪米歲資其來往邑豪肆虐衆擒其僕欲訴之有司孺人曰其主無禮其僕何辜仇報寧有旣乎

里人子竊物被擒孺人命釋之復贈以布粟曰知汝素貧以此爲營生資可也乞兒匄不遂詬於門孺人遣問其所欲曰但得每歲米麥各五斗足矣孺人復遣語之曰速去吾當歲以給汝後卅餘年其人病且死孺人饋米者適至匍匐拜於牀而絕佃人逋租孺人遣語其家曰來吾代汝償之其家以所逋告孺人出倉中米如其數與之年終按所入倉中米未嘗有缺乏也盛夏不驅蚊蚋曰此天地間生物吾不可以拂之且去將爲他人累也鳥獸魚鼈昆蟲草木之類有可全其生者咸計安之孺人年四十餘蚤蝨不生

蚊蚋亦遂無近身者卒後十年吾家燬於兵室廬蕩盡惟孺人木主出之殘灰餘燼中無所損人以爲天所佑云生子三長爲吾曾祖贈中大夫字元顯曾祖母贈淑人管氏太平鄉華渡里人事姑郎孺人幾四十年事事以姑爲法不敢加也亦不敢不及贈中公授徒於外家事一關淑人淑人指畫經綜秩如也僮僕隨其資才無廢務衣食苦樂必均遇內外族人各有恩義生子四長爲吾祖修撰公字靜山吾祖之舉應天鄉試也淑人年四十有八又十三年吾祖廷試第一官翰林院修撰又三年三叔祖黃陂縣知縣

簡庵四叔祖天津道副使闇齋同舉江南鄉試淑人與贈中公尙無恙於時薦紳傳爲盛事吾祖母贈淑人吳氏縣城人入門之日祖舅祖姑皆在堂淑人事舅姑以上逮祖舅姑咸得其懽心祖姑郎孺人謂姑管淑人曰人爲吾慶得佳婦吾今復爲若慶佳婦矣族之父兄鄉之耆老僉曰新婦與郎管合德三世矣麟巷其代興乎麟巷三省所遷也順治乙酉秋鄉兵爲亂淑人負姑匿於林間而自以身翼蔽之曰寧婦死無驚我君姑也修撰友于兄弟淑人視諸娣如姊妹字諸從子女均於己子修撰之姑歸於徐郎孺人

出也年老失明淑人迎養於家飲食必親奉寢息皆親視之人以爲過恭淑人曰吾今不得事祖姑得事夫姑如見我祖姑矣敢不恭乎族嫠貧甚淑人歲計衣食費資之輒卽匱因按月以給數十年無後期世家婦不能謀生淑人使女僕饋之戒勿揚於外言此非若所樂受也家素清貧修撰登上第世父按察又早入翰林淑人再受封誥貴顯矣而修撰急人之難振人不瞻孜孜如不及淑人敝衣藿食至老紡績自若也修撰旣樂善於師友誼尤篤淑人每見公入戶望其顏卽遙語之曰夫子得母有所需耶晨夕謂修

撰曰日來行善事有幾發善念有幾有善念未及行者贊行之恐後諭德之師卒於塾將啟喪修撰時在吳日者議開凶門以出淑人曰師與親等宜由塾達於大門奚凶門耶修撰歸聞之以爲知禮生子二吾父諭德其次也字芝田吾母贈淑人莊氏縣城人少受業於叔祖母尹氏通經書大指年十八嬪於諭德時吳淑人沒已三年矣未半載修撰亦卒淑人思慕舅姑終身諭德同產兄一人姊五人淑人事兄公如舅姒如姑女公若伯姊然也兄公按察姒馮淑人居東第淑人間數日必親往候之嘗見馮淑人有憂色

歸而不寐者竟夕晨遣女隸於馮淑人所馮淑人知之笑曰吾昨以某事不適偶然耳今亦忘之矣叔姒乃猶睽睽耶女隸歸言之淑人乃心安馮淑人後隨按察宦四方淑人念之輒簌簌淚下署中人至接家書捧讀之款款然如在馮淑人側也辛酉秋馮淑人之子玉應順天鄉試病幾殆淑人時從諭德在京師泣禱於神曰某有男五人而兄公長姒止此一子必此子不可生者願以某之一子代禱三日夜而從兄之疾瘳族子某不遜族父兄請治淑人曰兄弟之子猶子也族兄弟其初一人之身也忍校耶族叔某以

事來謁餽淑人以金淑人曰叔貧夫子弟也何用金爲且事以金成非夫子所樂聞也卒辭之不受姻戚無近遠必曲體其情以急困告者未嘗以有無爲解貧而我館者衣食之愈久愈不敢慢奴婢有過則宥之不可宥而後怒之雖盛怒無疾言遽色其有疾延醫治之不可治輒對案不食日三四遣問之死必爲之哭泣逮事先世或年長者不名以事見必立而與之言姻戚女使至雖賤必起去則送諸中門之闕且立功過格以朱墨別之晚輒檢之以自警椿兄弟夜歸自塾淑人取孝經小學及古忠臣孝子悌弟事一

一爲椿輩講之椿兄弟語言動作令母就所便案間
精果紙筆戒勿舉曰古人一介不取當自小時始冠
帶衣履悉用布爲之旨甘柔滑非餽莫之與飲食曰
兒曹年幼惟習淡泊薄滋味庶長成自然耳椿輩有
善戒母得自矜母道人之短母愧人以所不能母與
同學相謔母相聚爲嬉戲無益事歿之前一夕淑人
織於房椿兄弟自外至淑人教戒椿等夜分始休迄
今歷歷在耳也而淑人之背棄椿五十有二年矣痛
哉淑人子七人祖榮梅椿祖楫祖耜俱淑人出松喬
豐貽庶母高孺人出高孺人舊事淑人淑人以爲賢
言之諭德納爲側室者也子生在淑人卒後

贊曰椿年十三四時家有老嫗朱媪年八十餘高大
母婢也歷事曾大母大母暨我母椿詢以先妣遺事
媪曰老婦何知惟知我四世主母仁慈勤儉且言必
由中一無欺僞耳伯兄乳母梅媪事我母久方從兄
病篤我母泣禱於神也媪時在旁知狀爲椿道之尤
悉我母歿逾五十年族姻廬井有逮我母時者語及
我母未嘗不太息流涕也易曰觀其所感而天地萬
物之情可見矣天地萬物猶感於誠而况於人乎况
於骨肉乎吾子孫尙其勉之哉尙其勉之哉椿謹撰

書高祖母家訓後

修身養性之法大抵存心積德則無不利當撇下處且撇下得意事不可做便宜事休想做快心事不可做改過所以遠禍知止所以久福寡言所以卻害清欲所以去病更勤儉以補不足謙和以處橫逆刻己以應人之求虛心以受人之教存誠以守己之拙靜養以培天地祖宗之元忍事耐心安分課後整治門庭掃游軌藏是非則永无咎

右爲高祖母郎太夫人家訓高祖母慈祥愷悌時時以濟人利物爲心好揚人善人有犯不校有過必曲隱之卒之二十五年順治乙亥六月八日降乩於室書此以示子孫先修撰敘入太夫人傳今年夏念純表弟赴任寧洋屬書格言數則念純先姑自出與余同太夫人元孫敬錄爲贈念純其與余共勛之哉雍正五年四月戊戌

修撰公遺事記

順治九年五月

章皇帝詔舉遺佚先修撰與某某同時被徵修撰以疾至吳門請告僦居冶坊巷之茅氏宅茅吳學生也嘗執經於修撰院中古樹一株高數丈大可一二圍

蓋明嘉靖初植也修撰留吳門一載既得請乃歸命
僕李貞居之新其室去樹樹下黃白金十數罌茅欲
取貞不許命妻及子女守之而自奔告於修撰修撰
曰此故茅氏宅金彼物也我何與貞曰茅居此未三
十年樹固百餘年矣茅何與且茅未償主人值貞現
居其室中奚讓爲再三請卒不許貞恚曰富貴人所
欲世乃有不願仕不喜財如主人者乎語觸修撰修
撰還其券遣之曰汝急去無以金溷我茅尋以三千
金來饋曰某感公高義願奉此爲公壽修撰不受曰
吾果貪若金奚止是舍多而取寡吾豈爲之哉貞後

爲孟學士亮揆闖人康熙二十一年先諭德至吳謁
學士於里第貞時年七十餘矣見刺問奚自於修撰
公何屬家人輩語之喜曰我主人也爲具述前事曰
某往以貪愚得罪老主人幸主人恕我我歸私分茅
氏物未幾妻女歿又未幾子與媳俱亡壻今亦他往
矣身老煢煢無所依新主人憐我命我司闈要旦暮
人耳因感泣不已蓋去卻金時三十年矣又二十餘
歲椿侍諭德公於淮浦冬夜客有談裴中立許大理
事諭德公舉以語椿又二十年椿謹記之如右時雍
正元年七月日也

孟鄰堂記

椿家世居武進縣永勝西鄉之臨巷大父修撰公始遷府城白雲溪之左去縣學不數十武康熙辛巳椿自京師歸伯兄命居室之東偏距學爲九近堂名含生嘉靖中江陰王百穀所題也明年壬午椿侍吾父於清江浦吾父易之曰孟鄰手書付椿曰小子識之此汝母志也椿歸懸之堂中憶椿襁褓時吾母誨椿曰孟母三遷欲其子端所習耳汝祖故居學旁汝不自勸耶年六歲出就外傳吾母問椿曰汝讀何書對曰論語論語云何曰學而時習之所學何事曰孝弟

何以知之曰次章曰其爲人也孝弟六章曰弟子入則孝出則弟母喜因舉古孝子悌弟事訓椿曰汝勉之汝能是庶可以爲人矣他日又問曰曾子曰爲人謀而不忠乎與朋友交而不信乎何謂也椿舉註以對母曰是也汝今在塾同學以課業汝商者汝謀未審而遽以爲是遽以爲非不忠矣謀之審而語焉不詳道焉未善亦不忠也言語參差然諾或苟不信矣明知其義而勉人而汝反不爲明知不義而沮人而汝反爲之亦不信也忠信德之本也不忠不信於己尙何有於人哉汝其戒之吾母因椿所讀書善誘之

類如此其他飲食言語出入起居無一不教而敬老
慈幼推之愛物者尤詳且切椿時雖幼謹識之不敢
忘康熙甲子秋吾母歿吾父爲母行述云淑人性最
慈行事一出於寬厚獨其訓子女也則嚴過於子迄
今誦斯語未嘗不涕泗交頤也吾母歿六十七年吾
父歿三十六年矣椿不類不明不能聰聽父母之彝
訓學爲子而子之道未盡學爲弟而弟之道未盡學
爲友而友之道未盡今旣毫無成仰瞻堂額俯思二
親之所以訓因述名堂之意爲記俾我後之人知我
兩先人善教而椿之罔念以忝我所生自怨亦深自

艾也乾隆十五年四月四日椿謹記

族祖父衢州公傳

公諱廷望字兢如初名廷錦椿祖修撰公從父弟也
年十六補崑山縣學生以奏銷事斥遂留心經世學
嘗言仕宦莫善於親民親民必先於富教丞簿以下
不敢親也通判以上不得親也親之者其惟知縣乎
又言論語曰旣庶矣又何加焉曰富之旣富矣又何
加焉曰教之管子曰倉廩實而知禮節衣食足而知
榮辱王霸雖殊其富教一也康熙十三年應四川巡
撫張坤載聘六月抵廣元大兵方圍賊將王屏藩於

保寧公語坤載曰成都爲賊巢守兵單弱士民多不順誠出奇兵進劍閣直擣之成都必破成都破則保寧賊不戰自潰否必爲賊所困矣坤載不從七月賊攻廣元坤載戰敗脫身逃廣元遂失公流寓夔州興安漢中者久之十八年椿世父按察公爲湖廣蘄黃道副使公往依焉按察公轉餉湖南晉貴州參政公在幕贊畫爲多二十五年以國子監生選授河南上蔡縣知縣上蔡自明季兵燹河流羨溢田野荒蕪民人墊隘愁苦無所控訴公至喟然曰是非余之責而誰責歟不三日躬行阡陌循視諸河及故溝之可考

者凡爲河二十有三川一汀一池一洫二陂三湖五溝一百有九公相其大小緩急以先後治之洪河經縣百餘里岸卑下水易溢導之自縣西北始左分爲王四溝右分爲汭河東南入於汝陽汝河寬廣而淤淺沙河勢湍急易冲决導汝河東過朱里爲朱里河又東過蔡埠爲蔡埠河又東過懸弧灣與沙河會又東入於汝陽蔡河源於城西南澗泉本細流也經城東匯爲河夏秋溢溢特甚黑河上淺窄而下多淤包河勢同湖泊一縣之水半匯焉導蔡河東分爲西朱馬河又東分爲東朱馬河又東分爲茅河又東經雷

五洲堂文金 卷之五
安里與黑河會又南經高生里與包河會又東入於
項城界溝河源出縣之扶臺鎮久爲平陸導之北入
於陳州青龍溝衡漫幾三十里土地曠人民希白馬
溝在西華上蔡商水三縣交水盛時先賢漆雕墓常
沒焉導青龍溝東北入商水縣之龍灘河導白馬溝
北入商水縣之粉河樹河者西平縣汝河所分導之
入於朱里河柳堰河者舊入遂平縣之沙河後爲遂
平知縣所塞無所入小沙河者遂平縣郎家口沙河
之決流阻於遂平之勢不得塞導之皆入於蔡埠河
河源溝者汝陽縣馬腸河之源北馬腸河其又一源

也導之皆入於汝陽草河者朱馬河之別流導之亦
入於汝陽杜溝有五俱淤絕又爲蔡河所斷中間已
成大道不可復開導其在蔡河北者入於蔡河導其
在蔡河南者入汝陽縣馬腸河五龍河者杜三溝左
枝導之而杜溝之水及諸水不能南下者皆由此入
朱馬河以達於洪河其他小河小溝川湖陂池汀洫
或導之注於大溝或導之達於大河或濬之以通其
氣或分之以殺其力或濬之令有所休息游盪蓋入
陳州商水者十之二入項城者十之三入汝陽者十
之五又爲隄八洪河隄王四溝隄包河隄樹河隄沙

五洲堂文錄 卷五
河隄小沙河隄柳堰河新隄柳堰河吳家嶺隄長或
百餘里或六七十里或四五十里三二十里短亦十
餘里或五六里寬皆三丈餘高八尺於是水行地中
田野闢行旅通方工之始興也鄰縣不樂公開濬有
言公平地開河者有言公以鄰國爲壑者會巡撫檄
查水利公詳言水性就下必上流之隄防固始無泛
濫之虞下流之疏濬深方免填淤之患上蔡上流則
西華堰城西平遂平下流則項城商水陳州汝陽上
流不固溢決依然下流不深壅塞如故請敕令上下
鄰封一體疏築巡撫以爲然而公亦於茅河開有石

橋者七謗議始息遂益專心疏濬勸農桑勤勞相豁
民之有糧無地者五百餘頃量田方圓編以字號爲
魚鱗冊田之主名丈尺四至原隰阪險邱陵墳衍之
故畢具縣無隱糧亦無賠課學宮頽壞久矣公捐俸
鳩工以繕之請頒禮樂圖式於禮部幣聘教猷舞羽
者於曲阜請印經史及性理經濟書於國子監先師
之廟明倫之堂名宦鄉賢之祠齋廡廡舍廩庫門牆
靡不新罇彝簋簠豆登籩俎靡不潔鐘磬簫管笙竽
琴瑟埙篪祝敔鼗鼓旌翟靡不飭凡歷四年而學宮
之事成又建上蔡書院於城西延名師其中縣之彥

俊皆造焉置學田以贍之室以間計者六十有三田以頃畝計者一十五頃七十八畝有奇又建至聖尼廟於蔡溝漆雕開祠於華陂蔡仲廟謝先生祠霍節愍公祠三賢祠於城之四門皆置田以供祀事又建伏羲廟於著臺清祭田二千五百畝之爲僧占者凡祀典應祀而舊無文者秩之不應祀者已之三十一二年間陝西大旱民之來上蔡者以萬計飢於公平食寒於公平衣病於公平醫藥死於公平斂葬歸於公平資斧蓋公在上蔡九年百務具修神人和協巡撫以公能富教其民將特薦公於朝而公已秩滿而

離任矣三十四年陞山東登州府同知登州瀕海上同知又清閒無事歲奉巡撫命往來於京師陝西濟南濟寧泰安武定間而已四十五年陞浙江衢州府知府衢州與江南江西福建俱接壤其俗雜其民貧其地山高而水駛公思所以整理之首建府學規模經制如上蔡檄五縣之學皆新焉西安縣石堰於諸堰中最大亦最古公檄令急修之餘見府舊志及屬縣志者悉一一檄問令其存者修廢者復無者增皆以上蔡治溝洫之法治之城故有河久不浚民或築室於其上公請出疏之俗以嫁女破產雖富族亦不

舉多溺之者公嚴禁不少恕并禁市之以銅鉛雜銀以水漬米者又禁民之博奕羣飲好勇鬪狠者又禁訟師誣辭興訟出入官署爲姦者公每有所禁必詳爲條教至於再至於三尙有不用公命公乃以法懲之其懲也以一警百民無不畏服恐懼改過自新者四十八年旱公單騎減從親詣四鄉諭富民開倉平糶又勸令貸於鄰里之貧者貧者得食而富者怨矣其秋未穫商舟糶米者雲集米價一日三長老幼驚惶請公禁其出境公從之商人失利者皆恨於是胥動以浮言而公以封倉遏糶被劾矣初公在上蔡其

民愿公務爲興利衢州之民龐公兼在除姦治稍不同而民之感公同也公旣罷官不能歸衢民亦不願公之去因留衢三載五十年九月卒於衢衢士民巷哭皆泣奠於公之權前上蔡民間之爲公建祠於書院歲時以禮祀焉

贊曰椿讀公自譜及上蔡縣志於上蔡溝洫詳矣公嘗語椿云此事非我不敢爲我亦非在上蔡不能爲也是以特具論之公善聽訟有神君之稱椿每以問公公曰聽訟何足道不能無訟方愧耳性孝友年七歲父奉政公爲鄉兵所害公痛不欲生自後遇忌辰

孟鄰堂文鈔卷之十五
輒號慟終日母王宜人性嚴事之未嘗失其懽心而友于其弟封知縣公尤有非他人所及者公每言修撰公吾師也修撰公建祖廟公重新之修撰公刻家譜公續梓之修撰公家居修府縣學公所至必以修學爲先務雖暫署登州府印棲霞縣印亦然修撰公敦本睦族後已先人公亦皆倣而行之而於骨肉間容人之所不能容忍人之所不能忍尤與修撰公後先一揆嗚呼豈不賢哉

孟鄰堂文鈔卷之十五

孟鄰堂文鈔卷之十六

武進楊椿農先氏著

曾孫魯生校字

伯兄遂根先生墓志銘

乾隆十二年月日從子山東兗州府捕河通判紹曾葬其父歲貢生候選訓導遂根先生於陽湖永豐西鄉鄭村之原先生第三弟椿爲之志曰先生事親孝友于兄弟自少工詩文慨然有利濟志嘗自言有爲者亦若是先憂後樂范文正公何人哉年二十先大夫宦京師先生代理家政秩如也置祠田百畝爲丞嘗費見人文行可稱者亟言之先大夫推引成名者

甚衆親黨婚喪不能舉必捐金倡義周之家中男女老幼內外幾百人奉條約惟謹事勞逸大小必均性闊達有智畧議論偉然於古忠臣良士儉夫壬人事迹家國興亡治亂是非得失之故靡不熟於胸中與人言亶亶終日不倦聽者欣然各自謂聞所未聞也有弟六人其四吾母莊淑人出也年相若其二尙幼康熙癸未除夕咸集先生所先生謂諸弟曰君等皆俊才吾以年長領袖諸君惟氣稍勝耳仲兄曰兄才實大弟輩安敢望一二每則兄步趨兄未奔軼絕塵弟輩已瞠若乎後矣椿素拘迂凜昔賢自棄自小之

訓有告之以過必改人有過亦惟恐其不改也先生謂椿曰弟以第一等人自待復以第一等人待人意良厚矣然柰強人何己未然而責人以己所無是誣己也已已然而求人以己所有是誣人也誣己不可誣人其可乎弟其戒之椿自是力悔其後涉世卒屢以獲咎益信先生言不爽而椿之未克遵先生訓爲恨也先生十一試不售益以敦本睦族爲己任乙未春先大夫卽世先生時已病哭泣悲哀幾殆者數矣明年年五十月三日病革猶經理祠規力書之於冊越翼日歿矣哀哉先生姓楊氏諱某字茂實遂根

其讀書室也所著有遂根齋集若干卷先大夫諱某
康熙己未進士左春坊左諭德大父諱某明崇禎癸
未第一名進士翰林院修撰曾大父諱某府學生鄉
飲大賓累贈中大夫貴州布政使司叅政娶海寧陳
氏子三長卽紹曾雍正癸卯舉人爲今官嗣曾乾隆
戊午舉人纘曾國子監生女六壻方某徐某吳某周
某莊某錢某孫男七女三曾孫男三女二先生與諸
弟燕語之明年先生以事至京師歸而五弟已病臥
不復能曩時之聚矣自是或出或處或疾或亡忽忽
五十年今其在者惟余與幼弟根心兩人耳小宛之
四章曰我日斯邁而月斯征夙興夜寐無忝爾所生
兩兄三弟旣不可復作而七弟在淮之南余在冀之
北不相見者又已十年踽踽畏畏余亦且將耄矣日
月邁征者何事夙夜無忝者何時撫今追昔輒不禁
出涕沱若也銘曰

嗚呼先生畀之者誰富其才智梃之者誰嗇其年位
富也何恩嗇也何喟惟不遐考怡怡一堂斯之爲痛
其何可忘卅年永逝今歸元宅銘以送之以寫余臆

嗣曾

十五而失怙於吾父生平行實百未得一二

每嘗追憶抱恨窮天今吾叔之志吾父全以至性

孟鄰堂文集 卷十六
結爲文章跪讀再四俾少孤得悉先人行實并如
接音容於三十年後也吾叔之志曰出涕沱若
曾之悲哀痛悼更曷其有已耶

仲兄古度先生墓志銘

仲兄古度先生年六十有二以雍正十二年十二月
十一日卒卒之十年孤昌吳始克葬先生於某縣某
鄉某里之原時椿在京師不克爲之志後十年乃追
志之曰先生諱某古度其字也爲人真摯誠實讀書
制事皆全力注之有間之者不能奪也業師江陰黃
仔薪先生宜興儲同人儲允文兩先生同縣蔣弱六

先生皆稱先生文曰此國初諸子文也康熙丙寅冬
補縣學生己卯以歲貢生中順天鄉試副榜雍正丙
午選池州府建德縣學教諭建德俗樸陋士鮮以文
著者先生至數日語諸生曰士先器識而後文藝士
不能文由讀書少故器識不廣耳舉五經子史程朱
諸大儒書訓之爲嚴立條教母欲速母躡等母作輟
母畏難而就易母捨淺以圖深又爲之口講指畫甚
則飯蔬羹豆留與之語常數日不厭始則皆茫然猝
不知所謂繼乃惺然悟後乃勃然皆大奮人人恐有
所不知有所不能以爲愧先生在建德七年縣之文

風日以變士習日以端先生精神亦日衰壬子冬告病乞歸矣先生既少以文名長益刻厲勤苦慨然有志於功名之會率夜分而寢五鼓卽起以爲常甲辰春鄉試至京先生年五十有三應有司舉已十有七矣向時同學之人登上第躋高位後生新進亦各掇一科或效一官以去而先生尙困諸生中人莫不爲先生惜先生每飲常數斗不亂酒後意氣愈豪至是飲一二升卽醉醉則頽然就寢矣其自建德歸也飯不過一盂酒不過數合終日兀然一室與人語不一二言卽止逾兩年而遂卒哀哉先生素清貧家無百

畝之產豐年暖歲妻子有飢寒之色而賑貧施乏無虛日嘗有通糧者日昃過先生先生察其有憂色固問之其人以實告時將孟夏先生適窘甚舉橈上春衣令質之其人堅不受固與之而去又有習星術者遠府人也衆以其術劣皆薄之先生曰此彼生業也若皆然不幾無以爲生耶且如旅客何倡周之衆無不從先生者其他存心類如此先生亡遠近聞之皆出涕建德士子爲先生所造就及賑卹之者追念先生今尙淚涔涔下也娶同縣毛氏有賢行先先生二十四年卒子二長稷雍正己酉保舉陝西會寧縣知

縣先先生二年卒次卽昌吳乾隆庚午舉人女四適
錢某孔某薛某周某孫男二女五曾孫男一銘曰
嗚呼以先生之文學五舉而僅副貢於京兆以先生
之精勤又十有二舉而卒顛隳以終老嗚呼哀哉天
其尙福於先生之後人

四弟乘萬墓志銘

康熙四十四年

聖祖仁皇帝南巡召試東南文學之士以工詩入
內廷者五十五人弟某其一也又七年成進士官翰
林院庶吉士明年授編修又七年以疾卒於官時五

十九年七月初五日也年四十有四弟初名祖棻後
改今名字乘萬讀書刻苦能力自砥淬業師蔣弱六
先生陳半緣先生器重之年十七在京師同諸友游
城南黑龍潭用陳迦陵三疊六月韻賦七言古一章
半緣先生嘆爲奇作自是始以詩名前輩唐東江吳
西齋汪秋泉諸先生咸與爲忘年交其應試蘇州也
詩成卽歸有來言名在選中者弟接

駕無錫

御舟泊黃埠墩北岸天微雨

上命獨木小舟渡弟引 見於

御舟

上問家世有出仕者否弟以祖父名諱官位對
上舉父名語左右曰楊某老翰林也

御書程子詩於綾幅賜弟命江寧巡撫資路費其秋
以常州府學附生中順天鄉試第四名外省府州縣
學生得舉順天鄉試自此始弟既以詩受

知又高舉於京兆一時慕名請詩者相屬弟各因其
人與之非其人不與也有巨公方用事年少倖進者
欲一入其門不可得以盃幣延弟館於家弟力辭之
固請固不往衆咸爲弟慮其人益重弟數稱道於諸

公間諸公或語弟宜一往謝之終不往時議不以弟
辭館爲難而能使巨公不愠反稱道之爲難弟終不
往謁爲尤難也弟果敏有謀居家應世義所在必爲
有知之未及爲惟恐人先之急爲之如不及其未及
知者不得爲後知之未嘗不深自咎也交友必求勝
己者讀書制行則又恐不如人爲人剛簡嚴毅望之
若不可近而虛己善下與之處藹如也善柔便佞之
人足不及乎其門在館分纂有康熙字典佩文韻府
宋金元人詩餘南北二史八書菁華河南方輿路程
諸總裁咸稱之而故大學士常熟蔣文肅公尤敬弟

曰諸君所纂余或當覆校惟楊某不必吾信其無瑕疵也屢薦之

聖祖五十四年春

御試翰詹諸臣

上拔置弟於前列弟卒前一月故太傅尙書滿州徐文定公爲院長將薦弟聞弟病而止娶同縣孫氏康熙辛未進士禮部主客司郎中諱謀女子男六煜曾乾隆辛酉舉人內閣中書舍人和雍正己酉保舉湖北安陸府通判今爲五弟後武曾早卒勉曾國子監生瑞蓮

懋勤殿行走乾隆癸酉

欽賜舉人卓曾

御試賜國子監生今卒女二長適張某次適管某孫男五女二曾孫男一女三嗚呼以弟之材使其不死得有所建立其報國理家豈止於此而已哉迨弟死余次弟行事列其不赴巨公館於狀時巨公歿久矣乃有駕其名於他巨公以傾余且幾累弟於身後而始幸向之巨公之旁無匪人而後之誣辭害人者其可畏如此也墓在陽湖縣從政鄉運村之原葬以某年月日銘曰

孟游堂文集卷之六
士患無材無材不可以及人士患不遇不遇不得以
出身胡弟之材而遇而出身以及人者乃僅止於斯
已而已而誰實爲之嗚呼天哉

六弟日乾墓志銘

讀此志學士繁華清華其在鄉時實寔至此
則予今日之典衣肉食不足訝也忘伯甘識

弟諱某字日乾先大夫第六子庶母高孺人出也年
六歲塾師以暮春者爲題命作一破弟連搆十餘皆
有新意詞有類漢魏樂府者七歲成舉賢才三義議
論本之王制而間以己意斷之多前人所未發見者
以爲神童十六歲先大夫命余課弟弟汲汲孳孳惟
恐不當父兄意也明年余就館衢州弟亦從他師受

經自是漸有疾不能如前之純壹矣乙未春先大夫
見背時五弟已先卒明年伯兄亦卒又二年余與仲
兄四弟俱出仕弟在家獨持門戶先世產薄先大夫
在時衣食裁足弟無飢寒之慮先大夫歿弟多病不
能治生業則家日落於往時弟事高孺人孝天寒高
孺人未衣弟不知衣日昃高孺人未食弟不知食高
孺人有疾弟頃刻不離左右間則伺其痛癢撫摩而
抑搔之及卒喪祭之無違禮或以賄謁弟弟辭之曰
吾兄不願我如此我曷敢拂之始終未嘗一入公門
也余在都不善謀生甚於弟每騎驢出入鞍甚破同

巷人目爲破驢官人嘗大雨入朝待漏正陽門外前輩李佩尊謂曰君學杜子美耶何窶也余笑曰某較子美富矣子美詩東家蹇驢許借我泥滑不敢騎朝天某今乃已驢且泥滑敢騎豈子美比耶冬月無裘絮衣又綻綴方望溪戲言楊某喜敝緼袍聞者爲之大噱甌無米以黍爲粥與兒輩日一啜之以爲常以故弟在三千里外余未能時時周弟有深愧焉弟卒於乾隆六年冬十月二十有一日年五十有一以其年十二月初九日葬陽湖縣鄉小圩村高孺人墓側初娶溧陽黃氏繼娶丹徒張氏子遂曾國子監

生女嫁山陽程氏銘曰

思辭九百仲避萬鍾以類充之矯情則同彼不矯者禮義不辨禦以道交受之罔問閭里訢訢家室閭閻曰此悌友曰此睦婣伊余不敏曷敢言矯旣已辨之固窮是寶惟弟同心幸俱不疚刻銘於墓以詔厥後

五弟汝穫墓志銘

弟諱某字汝穫吾父諭德公第五子也生而穎異年四歲與余及四弟乘萬同就傅余長於弟三歲四弟長二歲先生每誨余二人弟從旁默聽已悉識之稍長讀經史率不過一遍四五年不忘爲文好深湛之

思出語必驚其長老十餘歲隨諭德公在京長洲韓文懿公上海周礪巖先生德州孫子未先生見弟文極稱之歸補縣學生縣中諸名宿折輩行願與之交弟抑抑翼翼欲如也爲人孝弟以謙自牧以虛受人慎起居薄滋味不爲年少嬉遨儂便事雖造次未嘗疾言遽色業師蔣弱六先生以聖賢呼之康熙甲申秋大病病久不愈臥牀者七年手披口諷載籍不離左右間則或歌或泣類心疾者然余謂弟曰若久病宜靜攝胡自苦乃爾弟曰吾非不知柰心無寄何庚寅秋余侍諭德公至武昌比還弟卒已兩月矣問家

人弟死亦何言云死之日神氣清朗語言明徹與未病時同惟不見父兄爲悵耳哀哉年三十有二娶崑山徐氏分守口北道參政諱炯女弟病侍湯藥以勤死四弟命次子和爲之服弟亡妾王氏有女已三歲子繩曾生亦數月矣繩曾旣成童讀書敦行惟肖僉謂弟有子而不幸未昏而歿余尤悲之因命和爲弟後成四弟志也余少鮮同學晨夕切劘文字砥礪名檢者四弟與弟而已每月落參橫荒雞夜號三人抗心希古惴惴然恐一不古人若者二十年如一日也而今已矣兩弟之亡近或踰三十年遠且踰四十年

而余更有痛者伯牛之疾顏子之短命伯喈之無子彼有一焉已爲聖賢所悲而弟乃兼之此余念及用罔不盡傷心也和以保舉前爲戶部七品官今爲湖北安陸府通判再贈弟如其官女嫁建平縣潘某銘曰

嗚呼吾弟子雖無子而子兄之子則一也不羸在躬而成子之志食子之德者不竭也嗚呼

亡室沈淑人墓志銘

淑人姓沈氏蘇州府吳縣人大父編修公諱世奔父學士公諱朝初母范恭人恭人檢討公諱必英女也

淑人少學於母氏通經書大指善女紅范恭人愛之旣歸余余母莊淑人已辭世事余父諭德公誠慤愈久愈得懽心見長年及吾母時者必詢吾母音容若何嗜好若何平日言動若何惓惓然其慕姑深也事少姑和以敬諸姑伯叔娣姒間無爾我撫從子女先於己子女雍正己酉春廷臣得舉其所親親友咸擬余長子淑人寓書曰仲兄公之齒長矣而未得一第從子稷又不售吾爲夫子計舍子先姪爲宜書未達余先以稷應

詔矣淑人聞則大喜或待余橫逆余仍善遇之淑人

知其日甚也卒之前數日手書自南來猶諄諄以不足校且不忍校爲言有友卒於余家僉議喪事淑人言殯宜於其寢所治喪於中堂櫃由正門出或疑不可淑人曰余聞祖姑事於先舅矣宜遵之又有病且殆欲自遷於他所淑人曰彼諒主人耳若從之是速之死也必不可余不善謀生淑人恆日晡不食冬月衣無絲絮恬如也吾父甘旨兒子塾師之酒食必豐潔或以鄰人之富語淑人淑人曰彼固應爾余曷敢擬之又言某事可有田若干某所可獲金若干何不言之夫子淑人曰貧富有道苟若者皆得吾夫子早

已不貧矣蓋愚性迂淑人之迂類於余余性真淑人之真亦與余同淑人見善必爲而余力每不足副之未嘗不愧負淑人也淑人以雍正七年六月八日卒年五十有五子男三述曾乾隆七年第二名進士翰林院侍讀耀曾實錄館議敘四川成都縣縣丞丞曾乾隆三年舉人戶部廣西司郎中女一嫁元和縣議敘州同知蔣植孫男五女一曾孫男二女一淑人父母舅三家皆世官翰林自余爲檢討封孺人爲學士晉贈恭人以子仕晉贈淑人蓋康熙後壬寅以來三十年間淑人疊應

寵命而余之晉封與其子追榮之典皆不克身親見之悲夫乾隆八年權厝陽湖縣從政鄉湖峴之原余時未爲之志頃於兒子書篋中見淑人手訓數百言因追志數事并採訓辭之意爲銘俟他日大葬俾納諸幽焉銘曰

慎厥友使心不盲不作無益使其業不荒不妄與使不多取不妄費使不多事兄弟相睦夫妻相敬使親心不逆食以時用以禮使室人不謫此自古聖賢修齊之道皆然乃今見諸淑人之誨言勒銘元石用昭懿德佑我後之人世世以爲則

單縣知縣立誠墓志銘

立誠姓楊氏名士凝從兄山西河津縣知縣諱玉第三子祖諱某山東按察使曾祖諱某翰林院修撰立誠生未期而父歿母徐孺人生母羊孺人共鞠之年十四余父諭德公自京師歸聞立誠孝弟稱籍甚又見所爲詩文則大喜尋泣下曰孫孤能是吾父兄之澤其未艾乎暇則勸厲之甚至立誠自是行益修業益進詩尤益工四方名宿見立誠詩者咸樂與之交康熙丁酉秋舉順天鄉試四上春官不利雍正丁未春故戶部尚書鄂公爾奇舉立誠孝弟

憲皇帝命往山東以知縣試用其夏署范縣事明年
丁生母憂服闋改章邱以前令失察事罷尋得白乾
隆丙辰補單縣立誠嗜讀書留心開濟嘗曰讀書而
不達於政猶弗讀也所至建書院課耕桑卹災祲凡
可利民者咸汲汲爲之單縣濱大河己未夏河水盛
溢勢將大決爲城害立誠率吏民築護城隄立水中
三晝夜吏民危之立誠親畚鍤不少輟久之水始退
縣中嘉壯立誠勇節以爲王子贛之風焉立誠明察
內敏其折獄不煩言而訟者自服每莅任不數月囹
圄空虛案無留牘上官賢之他州縣滯獄或數年或
連至于百人不決者悉委之立誠立誠剖決如流嘗
一日報銷大案二十餘上官益以爲能欲薦者屢矣
率以事不果濟寧民李氏父子以鐵冶爲業家頗饒
單縣民被劫者盜已獲而贓無所且有兇器數具立
誠庭訊之盜供兇器由李鐵工家贓已爲彼父子鬻
之矣逮李氏父子至鞫之則侗然手技人也立誠令
李氏子更衣雜衆役中立堂下其父偕倉夫數人縲
縲臥其側出盜謂曰誰爲李某父子者盜倉皇左右
視指倉夫一人役一人曰此是也觀者闐然獄遂決
一時傳以爲神丁巳冬余休致旋里庚申春奉

命北上往來運河河去三縣俱不遠民之頌立誠者
 相屬也而濟寧人以李氏父子事方立誠在時道出
 濟寧濟寧人焚香迎送者雲集立誠馬幾不得行立
 誠卒州士民各以類發哀於佛寺而三縣人哭之皆
 如哭其私親嗚呼可謂遺愛也已而前後十有四年
 三試小邑尙未竟其才也而不幸死矣傷哉豈非其
 命也夫立誠年五十卒於庚申冬十月三日以丙寅
 某月某日葬某縣某鄉某里之原元配呂氏祔呂氏
 先十六年卒贈孺人生子一奩女二壻王述義席紹
 芑後娶高氏生子二奎奎女一尙幼始立誠以母喪
 歸上官欲留之立誠曰此非心所安力辭之乃已平
 居自奉儉約制用尤不苟或嘗之立誠曰妄與者多
 取妄費者多吝吾弗敢爲也吾守吾固而已及其歿
 而廩無秣粟庫無窳錢後令欲撫其失卒莫能得也
 嗚呼難已銘曰

余嘗誦立誠詩至於新樂府未嘗不掩卷而嘆也曰
 嗟乎爲政者以是存心其政必可觀作詩者以是立
 言其詩抑可風矣嗟吾立誠所志者如此所得爲者
 僅如彼昌黎韓子有言由我者吾不我者天斯而以
 然其誰使然悲夫

李孺人旌節碑銘

節母李孺人者族祖父浙江衢州府知府兢如公諱廷望之側室也年十八歸於知府公又十二年知府公歿孺人時年三十歲長子賓十歲幼子震六歲孺人茹荼集蓼以育以教又十三年宸飭於學又十一年舉順天鄉試又五年巡撫都御史以孺人守節事聞 詔旌表其門如制而宸以 特簡教諭於宣化府之龍門縣學迎孺人養於官舍蓋去知府公時已三十年孺人年五十有九矣方孺人之歸知府公也知府公素清貧居官俸祿恆周三族之急者孺人佐

之如不及或以私蓄諷孺人孺人曰吾夫君廉潔中外共知吾縱不自愛獨不爲夫君地乎且得不以道後必歸之他人吾能負不義之名甘爲他人斂財乎公旣歿屢空日甚不肯勾貸於人曰吾聞之夫君民生於勤不勤而勾貸男子自好者不爲况寡婦耶吾惟食吾十指而已居常愛憐二子及課之也嚴甚於奴婢則撫之以寬曰二子幼失所怙吾不得不嚴奴婢服勞者也吾寧忍不卹耶處戚黨媼睦有肆橫逆者孺人以禮馭之其人後俱不敢復肆也孺人今在署布衣蔬食晝夜紡績如曩時教諭爲製新衣一服

之卽不服具甘旨以進間或一嘗之頻進弗食也曰
吾老嫠婦食貧茹淡久矣爾今初宦吾敢御輕煖而
饜肥甘乎乾隆十六年教諭書來曰吾母獲旌已十
二年而旌門之碑至今未立子其爲我文之椿不敢
辭乃敘而爲之銘銘曰

澤上有水其象爲節曰苦曰甘素位則吉伊惟節母
隴西之李歸我宏農歲及一紀二子髫鬣夫君遽隕
節母於時思以身殉還顧二子誰畜誰拊忍死銜哀
怒焉如擣蕭蕭朔風霏霏雨雪竈突塵凝盱猶無糲
何彼不良鞠哀罔念敢行非義來陵來犯節母處之

坦坦怡怡彼自愧赧俯首無辭僉曰節母女中之特
格彼橫暴不以聲色匪特其節其德實全貞順仁智
萃於一人慈以鬻子慈故能勇月落烏啼猶聞夜誦
自是卅年漆書金榜子復成名白華迎養僉曰節母
受茲遐福節母曰嗟夫君遺澤追念從前恍如易世
夷險相乘境非一致孰屯其初俾節之苦孰振其韞
俾節之甘惟苦悔亡惟甘有尙惟其有之是以佑之
永勝西鄉前黃之里作銘者誰家舊史氏

亡姊呂節婦墓表

嗚呼是爲節婦呂君鍾彥妻楊氏之墓節婦江南常

州府武進縣人吾曾大父鄉飲大賓贈中大夫諱某
曾孫女吾大父翰林院修撰贈中大夫諱某孫女吾
父左春坊左諭德贈奉議大夫諱某女也吾父生吾
兄弟七人姊妹四人姊於姊妹行第二幼穎慧女工
不習而能教以書史卽能通其大義吾母莊淑人愛
之年十歲吾母卒又三年吾父宦於京師姊依兄嫂
以居嫂歸寧數月姊年十四歲代理家事具有條理
又七年歸鍾彥鍾彥故大學士同縣諱宮孫廣東廣
惠分司鹽運司運副諱方高子運副年老矣家貧遠
宦鍾彥授室於我楊氏之館不三年病死所生子不

育運副與配劉宜人亦卒姊遂老於我家康熙四十
三年吾父歸姊侍左右十二年未嘗有惰容退則屏
居一室未嘗見其悅色羣從弟姪咸憚之雍正元年
憲皇帝詔旌節婦族黨欲舉姊姊不可曰不二所天
自吾分內事奚旌爲衆不以告奏行如故事姊知之
深自悔咎姊性仁愛於兄弟姊妹尤篤伯姊適華亭
錢氏三妹適溧陽狄氏相去數百里姊念之輒涕泗
橫流數十年如一日也乾隆元年冬三妹卒姊哭之
過時而悲明年余休致旋里伯姊自華亭來視余余
留之未去時自兩姊外余兄弟存者六七兩弟而已

孟齋堂文集 卷二
晨夕語次伯姊謂姊曰我與若同父雖多今亡已過半矣惟妹荷旌門歿可與蒸嘗之祭斯爲無忝所生耳余與兩弟以爲然姊聞之不自釋然也五年春余應

召北上姊泣謂余曰吾老矣近又多疾其不復見吾弟乎余愴然爲不行者久之明年冬六弟卒又明年姊病伯姊夜視之因中寒不數日而亡又明年夏余冢婦亦卒婦爲伯姊女姊自幼撫之歸余子述曾者也姊自是日夜泣病益劇其冬述曾假歸葬其母姊謂曰吾病不可爲矣汝不可不爲吾計月餘又謂曰

汝今爲我治喪葬吾死瞑目矣遂卒述曾合葬之於其夫之兆時乾隆八年十二月乙亥日也蓋自六年冬至是余四更骨肉之變中心如剝回憶姊別時語尤不禁淚之洸瀾也哀哉姊守節四十七年年六十有九姊生時伯姊憫姊老無依命第五子學詩事之姊亡學詩以姨子奉其祀後七年族人令姊再從子嗣隆爲之後嗣隆故泰州學訓導諱廷鷓第三子也始姊葬余不及爲之銘丙寅春志其大槩今書以遺嗣隆俾表於其墓乾隆十六年正月

邑廩生贈文林郎錢學聖先生狀

會祖諱一本明萬曆癸未進士巡按廣西監察御史
贈中順大夫太僕寺少卿累贈資政大夫總督倉
場戶部尚書

妣曹氏累贈夫人

祖諱春明萬曆甲辰進士資政大夫南京戶部尚書
妣董氏累贈夫人

張氏累封夫人

父諱霖明崇禎庚午舉人

妣張氏

本貫江南常州府武進縣新塘鄉段莊年六十七

先生諱養浩字學聖其先吳越武肅王後諱永岡者
自湖州大錢港遷於常州會祖太僕公明神宗時建
言歸里講學東林學者稱啟新先生祖尚書公事神
宗光宗熹宗莊烈愍帝爲名臣事皆具明史父舉人
隱不仕鄉邑高之舉人公生子十人先生其第四子
也性孝友事父母得其歡心舉人公謂人曰吾生子
不爲不多惟四郎善知我意舉人公年老有分於諸
子先生讓不受曰吾年長義不忍與幼弟同分也太
僕公置祠田百畝舉人公歿歲歉少收屢困於徭賦
衆咸議棄之先生獨任糧役乃止祖祠爲宗人所鬻

族人奉神主至先生家先生以禮祭之數十年不忒郡有先賢祠祠旁經正堂爲大僕公講學所歲久傾圮先生呈請修葺又請祀尙書公及明禮部侍郎吳公中行等二十二人於其中先生見義必爲不忘先志咸此類也平居好學覽輒數行俱下手錄十三經註疏三史唐宋八大家文及他詩文傳記而三禮三傳簡帙尤繁至老猶歲錄一過曰古書文義宏深不手錄則精神不接吾藉此爲晤對爾著七易緒餘闡易精蘊與人交然諾不苟尤好遠權勢不妄取故人有所爲大官者以幣聘至再三終不往與人言款款誠

實或終日不倦教子弟以讀書明道爲要務曰文辭末也德行本也未有本立而未不副者也爲文不傍門戶不屬草而自合繩尺爲縣學生以奏銷事斥不與試者二十年後以五經再試時長子安世已舉於鄉而先生年亦且將老矣乙丑歲禮部尙書吉水李公振裕視學江南得先生文第之高等次子濟世名世同時入學李公詢知之驚喜曰君父子今之三蘇也攜其文至京延譽公卿間先生歿後四年安世成進士又七年濟世以內廷教習知福建惠安縣而安世補官南和咸贈先生如其官壬午冬名世以舉人

入直南書房明年進士第三人及第官翰林院編修
晉侍講

賜第黃瓦門之左而名世子人龍亦年少成進士丁
亥春

上南巡視河過先生故里時名世扈蹕者再矣

御書詩書式穀以表先生

命名世齋歸以祭士大夫紀之以爲榮配楊氏明崇
禎庚辰進士江西按察使司副使諱球女贈孺人孺
人治家有法相夫子無違儀先七年卒子男四安世
濟世光世名世女三皆適士族孫男十二人女十二

人曾孫男十二人女十三人濟世等將以今年十二
月十七日葬先生武進縣西灣山祖塋之昭穴以孺
人祔先期名世齋濟世所次行畧告余曰先考妣歿
餘三十年乃今始克襄大事不肖等哀昏失緒大懼
沒先人之行願吾子之文之也椿不敢辭敬撮其大
者撰次之如右俾世之銘先生者考焉康熙六十年
十月朔日

賜同進士出身政治典訓館纂修官翰林院檢討

楊椿狀

楊氏節婦傳

椿讀

大清會典至旌表之條仰見我朝

聖聖相承哀矜煢獨崇獎節烈如此之至也婦人年三十內夫亡五十完節旌已年踰四十身故守節已十五年亦命旌之守節而子未仕旌已子雖仕而未封或雖封而守節在未封前者亦補旌之已婚守節旌已受聘未婚之女聞夫訃自盡或侍養舅姑或終守夫墓皆

特旨旌之其人現存或雖歿未久旌已遠或數十年近或十餘年亦博訪旌之旌無論存歿發帑樹坊已復建祠公所標姓氏祠中歿則設位祭之而且州縣不以報有謫督撫不以奏有糾隱漏遲延有罰又慮歷署既多吏胥需索

特詔本家舉報督撫歲杪彙題無庸往返駁詰於是直省所旌每歲少者數十多者數百天下不下千有餘人蓋自唐開元始備旌門之典宋金元明因之未有如我

朝之制之詳所旌之人之多嗚呼何其仁也或謂國家非常之典必有奇特之行或飢寒困苦克盡孝慈或視死如歸捐軀毀形者方足當之若循分守節尋

常女子所能似不得與奇特之行並余謂不然貧賤之家家徒四壁衣食不周而能仰事舅姑俯育孤子難已甚或舅歿姑亡子殤女妖形單影隻之死靡他抑又難也富貴之家心安逸樂父母舅姑娣姒姊妹並皆華顯而獨一未亡人介於其間以視寒門寡婦寂處孤帷無所見而心不亂豈不尤難也哉蓋子夏之賢得大聖人爲之師猶出見紛華靡麗而悅入聞夫子之道而樂而况女子乎志士仁人無求生以害仁有殺身以成仁孔子之言也女之事夫猶臣之事君成仁固不可生害仁更不可不死否則可以死可

以無死死傷勇孟子亦言之矣何必捐軀毀形之是貴哉伯夷叔齊餓於首陽之下餓非不食粟也不食周之祿粟耳陶潛有會而作乞食諸詩猶是也采菊東籬下悠然見南山秋菊有佳色裛露掇其英與夷齊采薇而食等耳夷齊不死牧野之師陶潛不殉元熙之篡寧遂非義士乎漢之龔勝新莽不强之爲太子師友祭酒宋之謝枋得元魏天祐不逼之北去則二人當亦如夷齊之采薇陶潛之采菊使周強夷齊宋逼陶潛則亦當如龔謝之自盡矣所謂易地則皆然也地不同則處之之道異節婦何尋常何奇特之

可別乎既以語或人因退次吾家節烈之與旌例合者其不合旌例而年在三十內守節歷十年以上三十五內守節歷二十年以上者附焉

張氏第五世質之配質字仲質早亡無子孺人守節四十餘年鄉里高其行欲上之有司孺人曰吾分應爾奚旌爲固辭之乃已

顧氏第六世厚之妾厚字克載生子溱四歲而克載卒孺人年二十五守節十四年年三十八卒溱舉宏治己酉應天鄉試廣東廣州府東莞縣知縣

張氏同縣同鄉唐莊人第六世紹之配紹字克嗣卒

時孺人年二十七所生女纔一歲妾蔣之子濂甫生孺人撫之如一女後歸於周孺人節縮其資糲曰婚嫁稱家有無矧有遺孤在耶濂長授承事郎孺人守節六十年年八十六卒遠近推爲女宗

王氏宜興縣溇湖鄉溇南村人第七世淮繼室淮字宗湜孺人來歸時年十有六楊氏弟兄同爨食指數千孺人無尊卑皆宜之年二十三宗湜卒無子以兄涑第三子邶爲後孺人撫邶及元配張之二女如已出邶亦事孺人極孝或勸孺人再醮孺人曰婦人從一而終况姑老子女皆弱乎必如若言吾惟死而已

其人不敢復言後病革邶延醫入視孺人曰吾未亡人也今死吾願畢矣敢以吾手令他人診乎遂卒年三十六守節十有四年邶後改名圻以軍功世襲鎮江衛左所正千戶

王氏縣城人第八世府學生贈文林郎南京東城兵馬指揮司副指揮墀之配墀字伯登孺人年二十四墀病將歿謂孺人曰我不幸短折汝年少無子柰何孺人泣曰我從君無難所以不死者姑老矣以君故愛我逾於諸娣姒君今不幸我復從君恐益增老人悲耳且君未有子他日君兄弟生子我當撫一人爲

君後伯登卒孺人事姑益孝又五年伯登弟圻之次子生姑名之曰鍾命孺人撫之爲子孺人愛鍾異甚見者不知其所撫也孺人後以鍾貴敕封太孺人年七十五守節五十二年卒於鍾之官舍鍾後陞廣西賓州知州未至任歸

池氏同縣人第八世南京太常寺典簿增繼室增字百川年五十而娶孺人元配陸之子鑰二十歲矣又四年百川卒孺人年二十四鑰孝於孺人嘉靖丁酉鑰以福建布政使司都事進階徵仕郎敕封孺人爲太孺人又十二年五十四卒守節三十一年

張氏宜興縣鄉金紫圩人第八世國子監生坊之配坊字伯矩年二十九卒孺人年二十六守節十六年年四十一卒子鏞

蔡氏無錫縣梅里鄉梅村人第九世通事鈇繼室鈇字中夫卒時孺人年三十一無子撫夫兄鍾第四子一脈爲後守節二十六年年五十六卒

劉氏同縣惠化鄉下坊人第九世銘之配銘字新夫卒時孺人年三十五守節二十一年年五十五卒子一儒

蹇氏宜興縣清泉鄉浯溪人第九世鏐之配鏐字戢夫年二十七卒無子孺人年二十六守節五十一年年七十六卒

杭氏宜興縣萬金鄉百瀆人貢生校之女第九世府學生鏐之聘室鏐字端夫父壩字伯堅杭與楊世交同里鮑林爲媒遂締姻焉嘉靖戊子年十二伯堅納吉於杭明年伯堅母卒校索納采禮伯堅以母喪辭校不可捏詞求退親於知府知府張大綸不許校計斃鮑林於獄伯堅以訟成疾不再旬而歿女聞不飲食者三日絕鉛粉薄滋味若居喪然父母兄嫂皆厭之驅之於外家依外祖母以居朝夕焚香禮佛如

孟鄰堂文錄 卷十六
是者五年嘉靖甲午大綸移官校恃其族盛仍受他
姓聘女知之自製襖衲衣一篋謂外祖母曰此與兒
身甚稱乞命婢留意藏之翼旦沐浴焚香自縊於佛
前年十八歲耳校葬之百瀆鳳凰山下未幾校以他
訟死崇禎戊寅兵部尙書陸完學上其事於朝始建
坊旌表焉

張氏同縣從政鄉寶相寺前人第九世鑛之配鑛字
麗夫卒時孺人年二十二子一濟始生孺人撫孤守
節四十餘年卒

孫氏同縣通江鄉孟河城人第十世國子監生一元
之配一元字子貞卒時孺人年三十三守節二十五
年年五十七卒子三汝舟汝梅汝霖

丁氏同縣 鄉袁塘人第十世一濟之配一濟麗
夫子也卒時孺人年三十一子汝進七歲孺人守節
四十五年卒

顧氏宜興縣清泉鄉湖洋渚人第十一世汝達之配
汝達字時通年二十九卒孺人年二十七守節五十
九年卒

孫氏宜興縣洞山鄉嚴莊人第十二世啟芳之配啟
芳字元華卒時孺人年三十二守節三十五年卒

十六卒子三廷玟廷琦廷玉

陳氏同縣

鄉小黃人第十二世啟達之配啟達

字元相卒時孺人年三十二守節二十五年年五十六卒子三廷輔廷猷廷選

邵氏同縣

鄉錢墅人第十二世啟辛之配啟辛

字元傑卒時孺人年三十二守節二十七年年五十八卒子廷銘

殷氏同縣惠化鄉下坊人第十三世廷盛繼室廷盛字明如卒時孺人年三十四元配胡之子大登十一歲矣孺人守節二十三年年五十六卒

徐氏同縣永豐西鄉青龍橋人第十三世廷鑑之配廷鑑字楚玉素多疾歿時孺人年三十三將自盡諸姑娣姒共止之自是操家益勤訓二子大范大韓益嚴或勸其少寬曰吾不可以慈故誤二子以負亡夫也順治壬辰辛丑歲大祲孺人前後捐穀數百斛設粥廠以賑飢民馬家村楊某大漕村周某上陽村王某貧不能自存皆賣妻以求活孺人鬻環釧代償其價三人夫婦遂全鄉里稱爲善女人守節三十五年年六十七卒

蔡氏第十三世廷鏞之妾廷鏞字鴻聲卒時孺人年

孟鄰堂文錄 卷二
三十五子正新七歲孺人守節四十五年年七十九卒

吳氏同縣 鄉秦溝人第十三世廷實之配廷實字爾信卒時孺人年二十八守節十三年年四十卒子三潛漢漆

李氏縣城人第十三世衢州府知府廷望之妾廷望字兢如孺人生子二賓宸年三十而衢州公卒孺人寡言笑行動不苟衢州公在時孺人未嘗有私蓄旣歿紡織度日機杼之聲與二子誦讀之聲相聞也守節二十五年宸舉乙卯科順天鄉試又五年奉

旨旌表是年宸以揀選爲宣化府龍門縣學教諭又十一年

敕封太孺人今七十有一就養子宸之官舍

羊氏同縣迎春鄉棧橋人第十三世廷梁之配廷梁字植如卒時孺人年二十無子族有逼之改嫁者孺人截髮以明志復逼之乃爲尼於 烏泥橋之泥

庵後若干年卒

張氏縣城人第十四世縣學生方岳之妾方岳字虞臣年五十餘無子納孺人生子翁占翁復翁彥而虞臣卒孺人時年二十九守節三十五年年六十三卒

徐氏同縣 鄉莊上人第十四世鳳翥之配鳳翥
字九霄有癩疾伯父修撰公構樓居之延名醫治之
百方卒不瘳康熙乙巳春修撰公卒明年冬九霄卒
孺人年三十四家貧甚守節二十五年年五十八卒
子三梓棟桂

吳氏宜興縣 鄉遮母人第十四世忠昇之配忠
昇字九雲徙居宜興縣 鄉永定村生子桐楮而
卒孺人時年三十守節 十年年 十 卒

孔氏同縣惠化鄉寨橋人第十四世大誠之配大誠
字九韶卒時孺人年三十二無子守節一十七年年

四十九卒

談氏宜興縣

鄉歸錦橋人第十四世淇泐之配

淇泐字九明生子業而卒孺人時年三十守節 十

年年 十 卒

錢氏同縣同鄉夏墅人第十四世世雄之配世雄字
謙吉淑人少聰穎喜讀書父贈文林君謂曰汝女子
耳纂組饁爨汝事也柰何效男子咕嗶爲淑人遂屏
書籍專勤女紅旣歸謙吉以不逮事姑爲恨每思之
輒淚下歲時祭祀及先世之忌辰必齋戒三日事翁
及後姑孝而撫其叔尤厚曰吾姑早亡叔今尙幼吾

敢不盡心乎謙吉從軍福建以功加左都督同知卒於京師淑人年二十九事翁及後姑益謹教其子若穀以嚴翁病朝夕祈天以身代翁病篤手書付若穀曰汝母孝順我汝當竭力以報書訖而歿淑人事後姑又二十年後姑歿淑人年七十有一矣哭泣哀慕如孺子先是謙吉伯父衢州公每得俸金必先遺淑人曰此節孝婦也吾不可不分

天子之賜與之淑人卽以納課曰

天子帑金吾不完國課敢私家褻用乎淑人守節四十七年年七十五卒又四年奉

旨旌表

羊氏常熟縣人第十六世山西河津縣知縣王之妾玉本名楷字端木後更今名字雪度孺人年十六來歸生子士凝期歲而雪度卒孺人年二十一將從死君姑馮淑人諭止之孺人自是不御膏沐不服綺縠不預內賓宴會有疾不延醫診視左右徐宜人奉養淑人者六年侍宜人者二十八年淑人愛之如女宜人親之姊姒然也宜人疾孺人目不交睫衣不解帶者數月宜人病篤執孺人手曰我與若相依數十年今捨汝去矣汝善自愛聞者皆爲感泣平居教戒士

孟鄰堂文錄 卷二十六
凝以植節槩慎交游絕嬉戲爲要務康熙丁酉士凝
舉順天鄉試又七年孺人奉

旨旌表又三年士凝以薦舉爲山東范縣知縣迎孺
人養於官舍明年卒守節三十七年年五十有七又
八年士凝補官單縣

敕贈太孺人

王氏同縣太平鄉夾山人第十五世穗之配穗字藝
穀卒時孺人年二十七家貧姑老紡績以供菽水二
子洪成俊成俱幼弱不能服農又不能從師讀書孺
人亦教之紡績暇則自以字課之歲歉鄰里或餽之

粟辭曰吾母子有手指卅不能自食敢重費長者乎
卒不受姑亡竭力營喪葬率二子負土成墳見者無
不爲之墮淚二子稍長皆命之力田孺人年三十五
病日日夜夜操作如平時又三年瞽仍紡織不休其所
製視年少有日或勝也又七年年五十四卒守節二
十八年

許氏同縣 鄉灌莊人第十五世用和之配用和

字子誠卒時孺人年二十八舅姑皆在堂所生子纔
三歲孺人以養老字孤爲己任明年大旱道殣相望
孺人家無升斗之儲或勸其他適孺人以死自誓焦

孟鄰堂文錄 卷三
心悴力進甘旨以奉舅姑餒始以食其子已則終日
不食不卹也今其年五十有九守節已三十二年子
孝成亦娶婦生子矣

贊曰吾楊氏詩書禮義之澤所從來遠矣女子失所
天者其矢志不回始終一致祇自謂命之不歎分所
應然者耳烏知是之爲節又烏知如是之節即可旌
也哉今幸邀

國典得荷旌門之寵蓋

聖朝勸節之仁政而亦吾家苦節者之殊報也是用
輯之爲傳抑余幼時聞之受業兄肇岐云族有徐氏

第十一世汝進字時用之配年四十夫亡家貧撫孤
孤再娶早卒又撫夫同曾祖兄之孫爲子後亦娶婦
而卒孺人遂無後年八十餘歿又有周氏第十三世
日森字奉賓之配奉賓死無子孺人年四十餘其叔
逼之改嫁誓死不從叔亦無子乃撫夫同曾祖弟之
子漢爲後又四十餘年年八十七卒此二人與旌例
尤不合而其遇與志均有足悲者故并著之傳末

楊氏節女傳

椿旣次吾家節烈與旌例合者十七人不合旌例而
遇可憫情可矜者十六人爲楊氏節婦傳女子適人

孟嘉堂文錄 卷二
守節者舊譜自萬節婦外皆未載今益以所知者四人具論之如左

萬節婦吾家第十一世汝振字起之之長女夫曰萬鎮字伯位宜興縣禮部尙書萬文恭公之族孫甫納采得瘋疾鎮父母來辭婚節婦不可父母爲治糲具嫁有日矣鎮疾益甚或請遲其行節婦垂涕嗚咽若不欲生者遂遣之至則分帷而寢舅姑難之節婦曰新婦職也烏有病若此而可不異寢者乎吾盡吾職以畢吾志而已舅姑以爲然節婦治簞席進盤匱必敬醫藥針砭費不足典衣服鬻簪珥佐之又不足擘

績紡織佐之鎮終不瘳十餘年舅姑歿鎮以病廢家中落節婦葬祭其舅姑以禮又數年鎮亦卒節婦葬祭之一如舅姑節婦蓋年十八而嫁嫁二十二年而寡二十二年中異寢不殊初嫁時也崇禎辛未宜興知縣童兆登聞之白諸巡按將請旌於朝以年例不合止後鎮歿四十四年年八十三卒嗣子筠事節婦以孝稱

陳節婦吾家第十二世懋溫字恭思第三女嫁同里陳其政恭思無子愛女甚於男節婦年二十九其政卒無子欲立後族人以其政貧不願爲之子節婦慟

哭不食者數日將自盡恭思力沮之其政葬節婦立
生壙於其穴曰不久吾將從夫地下矣恭思憐其志
謂之曰吾雖無子汝能是勝吾有子多矣留節婦於
家十餘年恭思卒節婦歸紡績以供饘粥康熙丁卯
節婦守節已二十六年年五十五矣尙未立後又若
千年卒

呂節婦吾父諭德公次女余之第二姊也幼讀書見
古節孝事低徊不釋手傳之者異之年二十一歸同
縣呂鍾彥鍾彥字行素故大學士宮孫廣東運副方
高子方高年老遠宦其夫人同行鍾彥贅於我家不

三年病卒所生子殤未幾舅姑亦卒節婦依兄嫂以
居康熙甲申冬吾父歸里節婦朝夕左右十二年未
嘗失父意乙未春吾父歿明年伯兄亦歿吾兄弟自
是多在外家窘甚饗殮不時節婦處之泊如也雍正
甲辰節婦年五十守節二十八年矣奉

旨旌其門諸姪爲節婦買宅建坊焉又二十年年六
十九卒守節四十七年始終在父兄弟姪家也旣歿
七年族人以鍾彥三從子嗣隆爲之後

馮節婦吾家第十四世正新字銘又之女爲人柔惠
通經書大指年二十嫁無錫縣五牧馮某二年某溺

死節婦將從之姑慰諭乃止姑年高性嚴子婦三人
其二皆不順惟節婦善承姑意姑喜之娣姒無禮於
節婦節婦無違言無慍色順受之而已馮雖舊族家
貧甚節婦善治生中年業漸裕族議伯季之子各一
人為之後伯子游閒不務本業季子罹於法家遂破
節婦未嘗有怨懟意嘗歸寧母有危疾節婦禱於家
廟割臂肉和藥以進乃瘳又十餘年母歿方節婦割
臂時暈仆者再家人婦適見之節婦戒勿言終母世
母未知女之割臂也節婦年六十有五守節四十四
年卒孫某某今皆有子有孫節婦晚年為拮据娶婦
者也

徐節婦吾伯兄贈承德郎祖榮字茂實孫女從子克
州府通判紹曾女年十五歸武進縣學生徐鼇客徐
與楊世鄰鼇客之父中書朝柱伯兄之女壻其母伯
兄次女也鼇客字初白幼工文嗜讀書伯兄以故重
親焉節婦初嫁時中書與父評事已辭世節婦事其
姑以上逮祖姑咸得其懽心四年鼇客卒節婦時年
十有九祖姑暨其姑三代相憐甚後數年祖姑卒又
十餘年姑卒鼇客之伯姊適寧夏趙秉鉞年二十五
而寡守節已十七年亦無子昨冬歸寧會母亡留與

節婦相依也節婦年三十有八守節已二十年矣
贊曰余讀毛公詩序節婦之詩鄘栢舟一篇而已以
魯說考之不止是魯說宋人之女既嫁於蔡而夫有
惡疾其母將改嫁之女作芣苢之詩則芣苢節婦詩
其言夫遇惡疾夫之不幸乃妾之不幸柰何去之采
采芣苢之草雖臭惡猶始於將采之終於懷擷之况
夫婦乎終不聽其母萬鎮瘋疾蔡人之惡疾也萬父
母之辭婚宋母欲改嫁其女也蔡人之疾在宋女既
嫁之後鎮之疾在節婦未嫁之先則異宋母欲改嫁
其女母女之私情萬氏之辭婚乃夫家之正理又異
蔡妻能不再醮於既嫁之後賢已節婦能不改字於
辭婚之日豈不更賢也哉王詩大車魯說亦節婦詩
也未章曰穀則異室死則同穴萬節婦亦有焉陳呂
馮徐四人視萬遇或異而苦節則同魯說邶栢舟亦
節婦詩也其三章曰我心匪石不可轉也我心匪席
不可卷也五節婦共之矣

焚黃告墓文

代父作

某不幸弱歲卽離怙恃不能盡一日之養於考妣自
考妣之歿又不能早謀吉壤俾兩先人異兆迄今四
十餘年始克合葬吾考妣於祖塋之昭穴自惟罪戾

孟嘉堂文金卷十六
無地可容顧賴先人遺蔭幸得竊位於朝歲在丁丑
天子以北征之捷加恩羣下咸得賜封其所生而吾
考妣有奉直大夫宜人誥時某繫身禁近未能卽
至墓所宣揚

聖天子錫類之宏慈以著吾考妣積善之餘慶夙夜
祇懼不敢自寧今者請急歸里爲考妣合葬之四日
適遇今歲立春之辰敬奉

皇帝制書以告而往者伯兄某任九江府知府有中
憲大夫恭人之贈任貴州叅政有中大夫淑人之贈
俱未及告於殯所今併錄黃以焚惟是吾考妣德積
於躬宜膺極品褒榮之典而伯兄不幸早世某又復
不肖不能恪稟先訓使我考妣未克躋於崇階此皆
不孝某之罪而吾考妣積厚流遠所以光佑我後人
者當有在於異日某不勝哀慕悚惕之至謹告

考妣焚黃告文

椿迂愚不材獲蒙考妣餘慶備員侍從餘二十年再
被追榮之賜不克以時卽事丁巳冬休致旋里惕厲
實深今秋

天子念椿舊習史事召充明鑑綱目館纂修之任行
將拜辭寢廟赴召

闕廷恭奉璽書齋祓以告吾考妣積德垂裕翼我後
昆教誨諄諄宛焉如昨椿雖不肖敢不祇承惟是椿
年六十有五精力就衰常恐力不從心有孤任使吾
考妣音容未遠陟降在茲眷念劬勞曷勝永慕謹告

七室沈氏焚黃告文

余家世清白自君來歸相從余於飢寒困苦中者餘
三十年君見理甚明居心忠厚家庭一二事尤近今
人所不能及迨余通仕籍君受孺人之封咸謂君食
報庶其在此而君又不數年卽世乙卯秋君以
今上御極恩晉號恭人而君之三子亦相繼兩舉於
鄉而君已俱不及見矣悲夫茲余應
召入都敬奉誥辭告於君之殯宮君其有靈尙欽承
之謹告

舉從子稷告廟文

椿不肖幸賴先人餘澤獲位於朝昨歲冬月

天子令內外羣臣各舉所知而椿備員 禁近宜舉
一人以告顧惟平日交游鮮少於四方賢士罕所深
識一門之內仲兄梅司教建德六弟松喬七弟豐貽
俱在江南椿與不見者或十二年或八年於茲矣諸
子年三十以上者共有五人長則伯兄之長子紹曾

已舉癸卯年江南鄉試甲辰年揀選知縣次則仲兄
之長子稷六應鄉舉尙未獲雋近自建德來都椿視
其爲人頗能謹力取與辭受亦知不苟年已三十有
六視椿長子述曾四弟長子煜曾次子和爲長椿欲
以稷應詔敬擇月之二十日特備牲醴告於歷代考
妣惟我歷代考妣尙默佑稷俾稷始終不懈實力實
心爲國辦事上不負

聖天子旁求至意下不隳我祖考之家聲則椿亦庶
得免於不明不仁之罪椿不勝悚懼感慕之至謹告

長男授職告廟文

今年夏

天子親試天下貢士於廷椿男述曾獲荷遺休對策
稱

旨拔置第一甲第二名賜進士及第授翰林院編修
是用特備牲醴告於歷代考妣竊念自明迄今進士
科取士三代受職翰林者海內祇有八家而我楊氏
四世相承尤益見我考妣歷代貽謀之遠燕翼子孫
者正未有艾椿且恐且懼敢不仰承先志訓迪述曾
俾稍有樹立報

聖天子特拔之鴻仁展我累世未竟之餘緒椿不勝

孟鄰堂文鈔 卷二十六
感慕悚恍之至謹告

長男授職告亡室文

今年夏長男述曾對策稱

旨蒙

恩拔置第一甲第二名賜進士及第授翰林院編修
此皆由我歷代考妣積善餘慶而懿德垂後亦惟我
恭人是賴是用特備牲醴諏日以告竊念恭人之歿
十有四年述曾今列朝班而吾恭人曾不克親見之
興言及此惻愴何已謹告

孟鄰堂文鈔卷之十六

跋

孟鄰堂文鈔十六卷武進楊農先先生著先生曾孫
官通守來杭因見示得盡讀之其文根據經史直抒
所見不屑屑規撫古人而兼有古人之勝通守嘗言
先生穎敏絕人過目卽成誦或舉經史諸子百家問
疑義輒誦原文相剖析累千百言無一遺者晚年再
入史館猶歷憶童時所見邸報一一相証不爽其強
記如此而先生與人書自言年十四後半日讀諸經
半日讀諸史積十餘年有讀至數千遍數萬遍者夫
以絕人之姿而勤于學如是何怪其文之與古作者

抗也嘉慶二十四年閏四月後學仁和馬櫪拜跋

同治辛未再入京師七月購此于琉璃廠書肆直錢八百學士文

筆醜實說經史有識斷與明史館總裁提調諸書及明憲帝成祖

英景間諸論皆讀明史者所不可不知上明鑑綱目館總裁四書尤有

闕系此亟待于後人修而明之也般庚攷第一篇有功鄭學寄族子龍


門教論論族屬書正正曉正流俗湯文正公傳言爭治河塞堤事獨

詳家傳內傳叙次皆簡嚴學士之父芝田官諡為先安仁府君座師

受知極深故評識之會稽李慈銘跋

先曾祖古文素爲方望溪先生所引重遺文十六卷
余祖與父均欲付梓未果余不敏不能表彰世德倘
不及今壽誌梨棗恐無以仰承先志獲戾滋多用是
編次前後校讐僞舛黽勉措資急授剗刷氏不敢以
無力諉也經始於乙亥年維夏告竣己卯年涂月底
以纘祖父未竟之緒云爾至文之合於古作者石君
相國味辛先生序中論之詳矣嘉慶庚辰春正月曾
孫魯生謹誌

Vertical columns of text in a traditional Chinese format, likely a list or index. The text is mostly illegible due to fading and the watermark.



金陵侯瑞
籍嘉興東



